



Arbeidsleiar Eli Ersland syner fram sengkje og handkle som kvar tysdag vert levert til brakkeriggen på Husnes.

**Den positive Hydroeffekten held fram i Uskedalen. Kvinnherad Vekstbedrift har avtale med Stord Innkvartering om vask og levering av sengkje, handkle og matter til brakkeriggen på Bogsnes. Dette fører til dobling av produksjonen og innkjøp av ny vaskemaskin med ein kapasitet på 500 kg turre kle. Kontrakten gjeld for to år i denne omgang.**

Uskedalen.no har før skrive om Uskedal Trelastlager og levering av materialer til understellet på brakkeriggen. No gjeld det Kvinnherad Vekstbedrift og ein kontrakt som gjer at vaskeriet vert bygd om og nytt utstyr vert kjøpt inn. Ny vaskemaskin er venta inn i denne veka, vel 2 meter høg og 1,60 meter brei. Maskinen har stor trommel og har kapasitet til også å ta golvmatter.

Om lag 90 personar vil på denne måten få sine sengkje ( pute, dyne og laken ) og handkle frå Uskedalen. Det er henting og bringing av varer kvar tysdag. I tillegg kjem vask av arbeidskle.

Arbeidsleiar på Vaskeriet, Eli Ersland, fortel at Kvinnherad Vekstbedrift utfører alle former for vask av klede. Verksemda har til dømes vask av arbeidskle for verksemdar som HMR, Selstad, Hydro, BKS, Slangeservice og Norsafe. Nokre kundar hentar og bringar sjølve. Tysdagen er fast leveringsdag i veka. Vaskeriet har også moppevask for lag og organisasjonar, til no 6 organisasjonar.

Den nye bilen, som Uskedalen.no har skrive om før, forenkler all levering og henting av varer. Lift og bruk av vogner fører til ein langt meir effektiv transport.

Tekst/foto/nett: Kristian Bringedal



Vaskeriet på Kvinnherad Vekstbedrift vaskar også arbeidskle for ei rekkje verksemder.